

## **Téerëe débpí bíní Saṅ ra Kúnsëe**

Saṅ fa na suu yen wonee bee ra, daa ri Saṅ fa non bëewí iniilla bíníyú Uni Nebi Yéésú-Kiristaa ra. Di bíníyílté un éeyë kay, yulidte wa bëewí bokuuy. Bee déb dë nék, bëewë dī bíní wë unna ra capuy. Bee ñee na ra, bíníyú bëy il jaṅi hom filib gin, dī wona'te jaṅii baaha yaa-ow. Bee millë' rë, bíníyú bëyí hínú Gayus. Di fi Gayus fi baa nék daa na húmú habra' koy-yaayya filib ngémë, níi luka' yee ri yéeh wë rë sah, ndah gémë gém dī rë.

Jamanii Saṅ bín fë, lahte bëewí húmú kaa'uute biti Yéésú-Kiristaa acce feey hente ow. Wa tíkuté wonute biti bal yii neba' ow mín paṅ, Koope ii rii haba' yin.

Yii baa daa tah Saṅ bíní bëewë gémú Kiristaa na ra, na baat waa teeḅ wa daa Yéésú, na won wa biti wa pokoh kaaf ka.

Di wonte wa :

- yii lenke tilë' niiñ (1 Saṅ 1.7, 2.9-11),
- yii lenke túuyë'í hasa (1 Saṅ 2.3-8),
- yii lenke kaa'ohi Yéésú-Kiristaa (1 Saṅ 2.18-23),
- yii lenke di waḁti pesuun koyyi Koope (1 Saṅ 2.28 níi 3.3),
- yii lenke di waḁti fahaa ow koy-yaafi filib ngémë (1 Saṅ 3.11-18),
- yii lenke dfee faha' Koope ow ra (1 Saṅ 4.7-21),

- yii lenke di nay faasuu pesi ëldúnë (1 Saŋ 5.1-5),
- yii lenke iña seedeyiru Yéesú-Kiristaa ra (1 Saŋ 5.6-12),
- yii lenke pesa na dúméh rë (1 Saŋ 5.13-21),
- yii lenke kaaf ka a fahanta' (2 Saŋ 1.4-11),
- yii lenke pesa'i Gayus kaaf ka (3 Saŋ 1.1-6),
- a yii lenke di madu Joteref a Démétíríyús (3 Saŋ 1.9-12).

Bëyí fí jaŋi téeríi bee béëb ay yúh di nay rii tilée filib ëldúnë fí beh, a di nay rii pesée a moroomi.

### *Una na ona' pes da*

<sup>1</sup> Koy-yaayyi yeh, mi bíní ron unni yee teeβi ðon yii lenke Una na ona' pesa ra. Dalaana, Una húmú në. Fun keltuute ri filoon fe, fun tíkuté rí il ngëey, fun yeelute ri te ya' yi fun tíkëhté sun fi.

<sup>2</sup> Pesi baa feeñiyohete, fun olute ri. Fun homu seedeyidi, fun na wonu yii lenke pesée na dúméh baa ra. Di húmú hëbís Boffa, te ri feeñiyohete fun.

<sup>3</sup> Yee olu fun, fun keltuute ri ra, fun homu woni ðon fi yaa ri, hen ðaa raa, ðon non fun na yen hen yínë, ðon non Boffa a Koy ka Yéesú-Kiristaa na ti di nonuu fun waa na nen.

<sup>4</sup> Don ot fun bíní ron unni yeh, fun saamu biti sosi keeññi fun mit sëk.

### *Tíl neba' niñ*

<sup>5</sup> Una liilu fun Yéesú-Kiristaa, fun na wonu ron ri ra daa ri beh : « Koope niñ koceec, yii ñúussé ínìh ðii na. »

<sup>6</sup> Yen won biti yen nonu d̄ii na, yen anti pesuun ñúus r̄ee, d̄eef yen felu felo, yen ñeyuy kaaf ka.

<sup>7</sup> Yen pesuun niiña ti di homa' d̄i fi Koope niiña nen raa nék, d̄eef yen henute yínë hanndal ki yen, ñif mi Yéésú Koohi hosse bakaad̄i yen bééβ.

<sup>8</sup> Yen won biti yen lahuy bakaad̄ daa, d̄eef yen nofuute affi yen, yen yíh kaah.

<sup>9</sup> Hena biti raa nék yen tahute biti yen bakaarute, yen d̄úhíd̄ d̄i búkkí yen raa, yii bosì hom yen na bééβ, Koope ay yen d̄ii baal, ladil yen. Koope júβpé te yii won d̄i bééβ paŋ d̄i.

<sup>10</sup> Yen won biti yen bakaaruy raa, d̄eef yen tikúté Koope feloh, te unni haalay keeñni yen.

## 2

<sup>1</sup> Don fi koyyi so', d̄on ot mi bíní ron unni yeh, nda d̄on b̄anti bakaad̄. Ndaa t̄il nii lah bëyí bakaad̄ d̄on na raa, yen lahute bëyí nay yen layre fii Boffa : daa ri Yéésú-Kiristaa, d̄i fa júβ d̄ë.

<sup>2</sup> Di fi Yéésú-Kiristaa fi baaha daa yera' afi sarah nda yen baalu bakaad̄i yen. Af yen neh kep daa tah d̄i yera' afi sarah, ndaa af bëewë èldúnë bééβ.

### *Túuyë'í hasa*

<sup>3</sup> Yii bee daa teeβ yen biti yen yúhúté Koope : ñeya ñeyu yen túuyë' yí Koope ra daa teeβa' baaha.

<sup>4</sup> Bëyí won biti yúh Koope te d̄eef d̄i na ñeyeh túuyë' yí r̄ee nék, bëyí baa feloh, yéeh kaah.

<sup>5</sup> Bëyí ñee woni Koope raa nék, d̄eef faha'i bani Koope mitte s̄ëk. Yii baa daa teeβ yen biti yen pokuute Koope na.

<sup>6</sup> Bëyí fí won bití pokohte Koope na, wafti pesaa dee pesa' Yéésú rë.

<sup>7</sup> Don fa faha' mi ní faha' yee ra, túuyë'ë bíní mí ron bee ra has neh ; dí túuyë'í maañce, bi don liilute ri dalaanin. Túuyë'í baa daa una mësúu ron keloh ra.

<sup>8</sup> Di filiḅ fi baaha bééḅ, lahte yin has filiḅ túuyë'ë bíní mí ron bee ra. Kaaf ka hom na ra feeñce Yéésú në, feeñce don na bal. Yee teeḅa' ri ra daa ri bití ñúusë hompe gét te niiñi kah-kah fa acce ní wocce.

<sup>9</sup> Bëyí fí won bití pesa' niiña te deefa faheeh tík koy-yaafee ke ri filiḅ ngémë íl, deef dí lís ñúusë.

<sup>10</sup> Bëyí fí faha' koy-yaafee ke ri filiḅ ngémë nék, deef dí pesa' filiḅ niiña, te lahay yii mín díi bek bakaad.

<sup>11</sup> Bëyí fí fahaay tík koy-yaafee ke ri filiḅ ngémë íl nék, deef dí aa ñúusë ; dí tílë' ñúusë, yéeh tígë në saañ dí ra, ndah ñúusë búumílté rí.

<sup>12</sup> Don fi koyyi so',  
don ot mi bíní ron unni yeh,  
biti bakaad don baalute ron  
ndah Yéésú-Kirista.

<sup>13</sup> Don ot mi bíní don fi baappi yeh,  
biti don yúhuté  
bëe' húmú në dalaana ní a dee ra.  
Don ot mi bíní don fi wahambaane ya  
a cafayyi yeh,  
biti don bagute Seytaane.

<sup>14</sup> Don ot mi bíní don fi tunjki yeh,  
biti don yúhuté Boffa.  
Don ot mi bíní don fi baappi yeh,  
biti don yúhuté  
bëe' húmú në dalaana ní a dee ra.

Don ot mi bíní dŋon fi wahambaane ya  
 a cafayyi yeh,  
 biti dŋon maanute filiḅ ngémë :  
 Unni Koope ee dŋon na,  
 te dŋon ḅagute Seytaane.

<sup>15</sup> Ngënë fēhii ēldúnë níi luka' iña filiḅ. Bëyí fí faha' ēldúnë, mínéh faha' Baap-Koo,

<sup>16</sup> ndah iñi ēldúnë daa wa yeh : paŋ yii boŋi meela' faannon, faha' yii fu ot dī, a gaan-gaanloh af iñi feey fi beh. Te iñyaaha bééḅ kolaay Boffa na, wa kola' ēldúnë.

<sup>17</sup> Ēldúnë a iña neḅa' ow filiḅ ḁa bééḅ hompe dŋúm, ndaa bëyí fí paga' yii neḅ Koope ay pes faraah.

### *Kaa'ohi Yéesú-Kiristaa*

<sup>18</sup> Don fi koyyi so', yen homute míllëen jamanu ! Don keltuute biti kaa'ohi Kiristaa ac ayo maan ? Tígë homuu yen bee ra kep, caakke kaa'oh yi Kiristaa yi ayute. Yii baa daa teeḅ yen biti yen homute míllëen jamanu.

<sup>19</sup> Wa fi yaa koluu yen na, ndaa nagajek wa nëníh yen na. Wa nonun yen na koon, wa tasun yen na. Ndaa míntí hena ḁaaha, nda lan biti ow yínë sah waa na noneh yen na.

<sup>20</sup> Don nék, dŋon liilute Ruuh-Peseŋ Bëyí selaa na, daa tah dŋon bééḅ dŋon yúh kaaf ka.

<sup>21</sup> Don ot mi bíní ron nék, biti dŋon yíih kaaf ka yúhë neh. Yúhë yúhú ron kaaf ka ra kay daa tah mí bíní ron ! Don yúhúté biti ḅal fel a kaah míníh ñéerë'.

<sup>22</sup> Kon daa feloha ? Daa ri ḅëe' kaa' ra, ḅëe' won biti Yéesú Buura Koo fal ri ra neh. Bëyí baa

daa kaa'ohi Kiristaa ! Di boolla' Boffa a Koy ka bééβ kaa'a'te,

<sup>23</sup> ndah bëyi kaa' Koy ka, kaa'a'te Boffa, te bëyi tah Koy ka deef tahte Boffa bal.

<sup>24</sup> Daa tah mi won don tee : pëkii iña keluu ron dalaanin da. Don pokoh iña keluu ron dalaanin da raa, don bal don ay pokoh Boffa a Koy ka na.

<sup>25</sup> Kiristaa gappe yen biti nagajek di ay yen on pesa na dúméh rë.

<sup>26</sup> Bëewë na fahuu múuydí don ra daa tah mi biní ron iñyeh.

<sup>27</sup> Ndaa don nék, mi yúhté biti Ruuha liilu ron Kiristaa na ra pokohte don na, tahte níi sohlaay ow teeβle ron. Ruuha daa na teeβ don yin bééβ. Di teeβa' yii hente kaah, na yëeddeéh yii hente fel. Kon pëgi yee nah ri ron ra : hëmi don pokoh Kiristaa na.

### *Dee wadti pesuun koyyi Koope ra*

<sup>28</sup> Mi won don tee koyyi so' : hëmi don pokoh Kiristaa na, nda yen lëhíh dara yii sídúun yen biti ri nimil. Hen daaha raa, yen ii húl a sopoh fiyi yiin fi baaha.

<sup>29</sup> Don yúhúté biti Kiristaa júβpé, kon don wadtee yúh biti bëyi fi tíl kotti júβpé, deef di koy Koope bal.

## 3

### *Koyyi Koope*

<sup>1</sup> Koy-yaayyi yeh, ëlí dee faha' yen Boffa ra kan ! Di faha' yen fahoo níi tahte yen na deekúu koyyi Koope, te yen koyyi bal ! Bi bëy ëldúnë yiíh Koope, daa tah wa yiíh yen.

<sup>2</sup> Don fa faha' mi n̄i faha' yee ra, yen henute koyyi Koope n̄i wocce. Di nay yen made fayu n̄ék, feeñiyuy yen n̄i lante doom, ndaa yen yúhún biti yiin nay feeñiyee Koy Koope ra, yeni nay made ndah yen ay ot di man d̄i.

<sup>3</sup> Te b̄eyí fí tik yaakaari yii baa Koy Koope na, bukuta' afi bukutoo, dékē' lan ti di lada' d̄i fi Koy Koope nen.

<sup>4</sup> B̄eyí fí bakaad̄ n̄ék, deef d̄i kaa' ñee woni Koope, ndah bakaad̄ daa ri kaa' ñee woni Koope.

<sup>5</sup> Don yúhúté biti Yéésú-Kiristaa ac hosi bakaad̄d̄i yen, te d̄i fi baa bakaad̄ ín̄ih̄ d̄ii na.

<sup>6</sup> Yii baa tahte n̄i b̄eyí fí pokohte d̄ii na, na bakaareh ; b̄eyí fí dékē' bakaad̄ n̄ék, deef teeḅa'te biti olay Yéésú-Kiristaa te yéeh rí.

<sup>7</sup> Don fi koyyi so', ow banay ron múuyíd̄ ! B̄eyí fí paŋ yii júḅpé, deef b̄eyí baa júḅpé ti di júḅé' Yéésú-Kiristaa nen.

<sup>8</sup> B̄ee' dékē' bakaad̄ d̄a non b̄eewí Seytaane, ndah Seytaane dal bakaad̄ dalaanin n̄i a deh. Koy Koope n̄ék ac yahi légéyí Seytaane !

<sup>9</sup> B̄eyí fí hente koy Koope, na dékéeh bakaad̄ ndah yee hom Koope na ra daa hom d̄ii na. Koope daa Boffi raa kay, d̄i mínéh dékē' bakaad̄ !

<sup>10</sup> Yii bee daa na teeḅa' b̄eyí hen koy Koope a bee hen koy Seytaane na ra : b̄eyí na dékéeh paŋ yii júḅpé mbée fahaay koy-yaafee ke ri filib̄ ngem̄e, noneh koyyi Koope.

*Ow waḁti fahaa koy-yaafi filib̄ ngem̄e fahoo*

<sup>11</sup> Nagajek, una keluu d̄on dalaanin ra daa ri beh : yen fahantuun hanndal ki yen.

12 Yen ɓanuy mada' Kayeŋ✧ múk ! Di húmú non ɓëewí Seytaane ɓëempé koy-yaafi. Yi tah dī ɓëem dī nék ? Biti pagad̄dī wuneh te yi koy-yaafa húmú júɓpé daa tah dī ɓëem dī.

13 Koy-yaayyi yeh, dara waray kún affon biti ɓëewë feey fi bee kaa' don.

14 Faha'a fahantuu yen ɗa daa teeɓ yen biti yen koluute kúl kë, yen ayute pesa. ɓëyí fí fahaay koy-yaafee ke ri filib ngémë, ɗeef dī pokoh kúl kë.

15 ɓëyí fí fahaay tík koy-yaafee ke ri filib ngémë il ɓéeb, ɗeef dī ɓëemëh ow. Te don yúhúte biti ɓëemëh ow lahay pesa na dúmëh rë.

16 Yii bee daa teeɓ yen ɗee waɗti fahaa ow koy-yaafi ra : Yéesú-Kiristaa yera'te ñiiní ndah yen. Kon yen warutee yera' ñiinní yen ndah koy-yaayyi yen.

17 Lah ɓëyí caakla'te anti ot koy-yaafi laheh yin, dī faaliyeeh ri raa, ɓëyí baa ay mínúu won biti dī faha'te Koope dīh ?

18 Mantee don fi koyyi so', yen fahanta' handal ki yen : won a búk rek teeɓaay faha' ow ; koloh paŋ kep daa mín teeɓa' faha' ow kaah.

19 Yen hena' ri ɗaaha raa, yii baa daa nay yen teebe biti yen nonu ɓëy kaaf ka, te affi yen ay took biti yen home ɗaŋ Koope.

20 Wuti affi yen tookay ndah pagad̄dī yen raa, yen yúhún biti Koope luk yen lah yermaande, te ri yúh ɓéeb.

21 Don fi yee faha' mi ní faha' yee ra, affi yen took raa nék, yen ii sídë' biti yen ɗage Koope.

✧ 3:12 3.12 Saame Dalaana 4.1-16



<sup>22</sup> Di ay yen on yii yen dŋaŋ dī ri bééβ, ndah yen ñeyuu túuyë' yí te yen paguu yii neba' ri.

<sup>23</sup> Yee túuy dī yen dā daa ri beh : yen gém Yéésú-Kiristaa Koohi na, te yen fahanta' hanndal ki yen ti di naha' ri yen Kiristaa nen.

<sup>24</sup> Bëyí fí ñee túuyë' yí Koope, deef bëyí baa pokohte Koope na te Koope pokohte dīi na. Yii bee daa teeβ yen biti Koope pokohte yen na : Ruuh-Peseŋ fa on dī yen dā daa teeβa' baaha.

## 4

### *Yonente yi paɗɗah ya*

<sup>1</sup> Don fa faha' mi níi faha' ra, ngënë gëewí gém bëyí won don biti Ruuh-Peseŋ ee dīi na. Lah síkíríi rí a nuf, don ay yúh nda Ruuhi Koope ee dīi na mbée íníh dīi na, ndah yonente paɗɗah caak tasaaruute feey fa.

<sup>2</sup> Yii bee daa na teeβa' bëyí Ruuhi Koope ee dīi na : dī won biti Yéésú-Kiristaa acce hente ow raa, deef Ruuhi Koope aa bëyí baa na.

<sup>3</sup> Ndaa bëyí fí kaa' yii baa Yéésú nē, Ruuhi Koope íníh bëyí baa na, bi kaa'ohi Kiristaa daa dīi na. Don húmú keltuute biti kaa'ohee ke Kiristaa baa ac ayo neh a ? Tígë homuu yen bee ra kep, dī ee ëldúnë nék.

<sup>4</sup> Ndaa don fi koyyi so', don nonu bëewí Koope te don baɗute yonente yi paɗɗah ya, ndah Ruuha hom don na ra luk bee hom wa fi yaa nonu bëy feey fi bee ra doole.

<sup>5</sup> Wa fi yonente yi paɗɗah ya, wa bëy feey fi beh. Yii baa tahte gonli wa bééβ yulla' yii

neba' bëy ëldúnë te bëewë nonu ëldúnë rë daa na sîkírúu wë.

<sup>6</sup> Yen nék, yen nonu bëewí Koope. Bëyí fí yúh Koope ay yen sîkírëh ; bëyí noneh bëewí Koope ii yen sîkírëh. Yii baa daa nay teebee Ruuhi Koope fa na yeñ ow kaah ra a Seytaane fa na múuyídf ow ra.

### *Di na fahuu*

<sup>7</sup> Don fa faha' mi níi faha' ra, yen fahantuun hanndal ki yen, ndah faha' kola' Koope na. Bëyí fí faha' moroomi, ðeef ðí koy Koope te ri yúh Koope.

<sup>8</sup> Bëyí fí fahaay moroomi nék, ðeef yéeh Koope ndah faha' ow teem Koope na.

<sup>9</sup> Koope teeþa' biti rí faha'te yen ðeh : ðí cépídté Koy ka laha' ri yínë kut ða feey fa, nda yen ñeya' ðii na, yen lah pesa na ðúmëh rë.

<sup>10</sup> Faha' gétëy beh : yen neh daa fahuu Koope faha'a gén ðë. 'Di fi baa kay daa faha' yen faha'a gén ðë, wola'te yen Koohi hawute sarah nda yen baalu bakaadfi yen.

<sup>11</sup> Don fa faha' mi níi faha' ra, Koope daa faha' yen ðaaha raa, yen warutee fahanta' hanndal ki yen bal.

<sup>12</sup> Ow ëllëy Koope ! Ndaa yen fahanta' hanndal ki yen ðaa, daa ri biti Koope pokohte yen na, te faha'a faha' ri yen ða feeñce yen na níi mitte sëk.

<sup>13</sup> Yii bee daa teeþ yen biti yen pokuute ðii na ðí pokohte yen na : ona on ðí yen Ruuha ra daa teeþa' baaha.

<sup>14</sup> Te fun olute, fun seedeyute biti Boffa wolte Koy ka sëmlë'í bëy ëldúnë.

<sup>15</sup> Bëyí fí won biti Yéésú Koy Koope, deef Koope pokohte dīi na, te dīi pokohte Koope na.

<sup>16</sup> Yen nék, yen yúhúté te yen gémúté biti Koope faha'te yen. Ahaŋkay, faha' ow teem Koope na ! Bëyí fí faha'te ow pokoh na, deef bëyí baa pokohte Koope na te Koope pokohte dīi na.

<sup>17</sup> Faha'i yen ow mit sèk rëe, yiin bis-këem, yen ay wëelíyèh affi yen, ndah deef dee pesuu yen feey fi bee ra a dee pesa' Yéésú-Kiristaa ra daa madu.

<sup>18</sup> Faha' na ñéeréeh a neeh ; faha' mit sèk rëe, bota' neeh botoo. Bëyí fí neeh, deef séentèh daan, te faha'a faha' yen Koope ra feeñay dīi na níi mitte sèk.

<sup>19</sup> Yen nék, Koope daa déb yen faha' daa tah yen faha' bani bëewë béeb.

<sup>20</sup> Bëyí fí kaa' koy-yaafee ke ri fliib ngémè anti won biti faha'te Koope deef bëyí baa fel felo, ndah bëyí fahaay koy-yaafee ke ri tík dīi íl rë, mínèh faha' Koope fa dīi tíkëy rí íl rë.

<sup>21</sup> Túuyë'ë helid' yen Kiristaa ra daa ri beh : Bëyí fí faha' Koope wadtee faha' koy-yaafi bal.

## 5

### *Di nay faasuu pesi ëldúnë*

<sup>1</sup> Koy-yaayyi yeh, bëyí fí gém biti Yéésú daa Buura Koo fal ri ra, deef bëyí baaha koy Koope ; te bëyí faha' baap deef faha'te koyyi.

<sup>2</sup> Yii bee daa teeß yen biti yen fahuute koyyi Koope : faha'a fahuu yen Koope, yen na ñeyu túuyë' yí rë daa teeßa' baaha.

<sup>3</sup> Nagajek, yen faha' Koope raa daa ri biti yen ñeyuu túuyë' yí. Túuyë' yí misikay,

<sup>4</sup> ndah bëyí fí hente koy Koope rek, fu faasse pesi ëldúnë. Yee tah yen faas pesi ëldúnë rë nék, ee ngémí yen.

<sup>5</sup> Kon daa faas pesi ëldúnë henay bëe' gém biti Yéésú Koy Koope ra ?

### *Ñña seedeyu sun fi Yéésú-Kiristaa ra*

<sup>6</sup> Yéésú-Kiristaa daa bëe' aya' muluþ a ñif ra. Di ayay a muluþ don, ndaa dī aya' muluþ a ñif. Ruuh-Peseŋ seedete yii baaha, te dī fi Ruuh-Peseŋ daa kaaf ka.

<sup>7</sup> Kon seede ya henute éeyë :

<sup>8</sup> Ruuha, mulaa a ñif ma, te wa fi éeyë yë béeb daa boku una yínë.

<sup>9</sup> Hém ow daa na won iña ot dī, yen gém rí rëe kay, assumaa wonni Koope neh, yee seedeyid dī Koohi ra !

<sup>10</sup> Daaha, bëyí fí gém Koy Koope na, kúdté seedii baa dīi na ; ndaa bëyí gémëy Koope, deef yampe ri fel ndah dī gémëy yee won Koope sun fi Koohi ra.

<sup>11</sup> Yee wonu ra daa ri beh : Koope onte yen pesa na dúmëh rë, te pesi baa ee Koohi na.

<sup>12</sup> Bëyí fí non Koy Koope na, lahte pesa ; bëyí fí noneh Koy ka na nék, lahay pesa.

### *Pesa na dúmëh rë*

<sup>13</sup> Don fa gémú Koy Koope ra, don ot mi won don unni yah, nda don yúh biti don lahute pesa na dúmëh rë.

<sup>14</sup> Wëerté yen biti yen dan yii ñéerë'té a yee faha' Koope raa, dī ay naal nufi yen na. Yii baa

daa tah yen yahti daŋ Koope raa, yen na sídíh dara !

<sup>15</sup> Kon wëer yen biti dí naalte nufi yen na raa kay, yen yúhún biti rek yen ay liil yee daŋu ri yen ra.

<sup>16</sup> Bëyí ot koy-yaafi filiḅ ngémë paŋ bakaadi kúréh ow safara raa, dí daŋira ri, Koope ay on koy-yaafee ke ri baa pesa na dúméh rë. Baa wonuu bëyí paŋ bakaadi kúréh ow safara. Ndaa yaha bakaadi ay kúré ow safara raa, mi wonay biti bëyí baa daa nay daŋiru !

<sup>17</sup> Yin ḃos ḃééḃ bakaad naam, ndaa bakaad ḃééḃ neh daa na kúḃ ow safara.

<sup>18</sup> Yen yúhúté biti bëyí fi hente koy Koope na bakaareh saye, ndah Koy ka kola' Koope na ra daa na níḃ dí ní Seytaane mínléh rí yín.

<sup>19</sup> Yen yúhúté biti yen nonu ḃëewí Koope te ḃëy ëldúní bee Seytaane laha'te wa.

<sup>20</sup> Yen yúhúté biti Koy Koope acce te daa ri on yen afa tah yen yúh Koope fi kah-kah fa ra. Yen henute yínë a Koope fi kah-kah fa af Koohi Yéésú-Kiristaa. Daa rii Koope fi kah-kah fa, daa ri pesa na dúméh rë.

<sup>21</sup> Mantee ḃon fi koyyi so', mëytíi ala ya !

## **Séréel Ndút: Unni Koope**

### **Ndut: Séréel Ndút: Unni Koope (New Testament+)**

copyright © 2020 Wycliffe Bible Translators, Inc.

Language: (Ndut)

Contributor: Wycliffe Bible Translators, Inc.

All rights reserved.

2020-11-20

---

PDF generated using Haiola and XeLaTeX on 28 Dec 2024 from source files dated 29 Jan 2022

a3a1238b-9393-5875-a4c5-1d3f38537bfe